

NAIM FRASHËRI DHE XHELALEDIN RUMIU

Dhori QIRIAZI

PERLA – Revistë shkencore – Kulturore tremujore

Viti XII 2007 Nr. 4 (47) fq. 36-39

Botuesi: Fondacioni Kulturor “Saadi Shirazi” – Tiranë

Në parathënia e librit “Iliadhë e Omirit” (kënga e parë, botuar në Bukuresht më 1896) Përmendet Lamartini, vjershëtor evropian. Ndonjë kritik i kohës për disa vargje të poemës “Bagëti e Bujqësia” të Naim Frashërit, të botuar po në Bukuresht në vitin 1886 thotë se janë të Lamartinit. Bëhet fjalë për këto vargje:

*“O popo! Kshu pse më vini para syve pa pushim? /
O ditët e djalërisë! O moj kohëz e të rit t’im!”* (Naim Frashëri)

Të vargjeve:

*“Pourquoi devant mes yeux revenez-vous sans cense, /
O jours de mon enfance et de mon allegresse?”* (Lamartin)

Për Naimin, “vjershë e Azisë ka bukuri të madhe, shijë të shumë, rrjeshtë të mirë, masë të pëlqyer, fjalë të xgjedhura e lodra të ndryshme”. (Iliadhë e Omirit... 1896, f. 13). Po aty ai thotë: “Janë shumë vjershëtorë arabë, po më të mirë janë vjershëtorët e Persisë.”

Ndër vjershëtorët persë ai vendos të parin Firdusiun që thuhet: “i urti i vjershëtorëve”. Këtë epitete e ka mbajtur edhe Rumi: *Molana*, por Naimi në këtë rast nuk ia përmend emrin Rumiut. Ai me radhë përmend Xhamiun, Nizamiun, Attarin, Hafizin e Shirazit, Saadiun, etj.

Edhe pse nuk e përmend me emër aty Xh. Rumiun, krijimtaria e tij tregon se Rumi ka qenë i adhuruar prej tij po aq sa edhe Firdusi.

Me poetin e shkëlqyer persian Rumiun, Naimin e kanë lidhur ngushtë disa përkime në ndjenja intime si brenga e emigracionit në tokë të huaj, vuajtjet shpirtërore. Kur Naimi përshtati poezinë e famshme të Rumiut “Fyelli” doemos i tingëlluan në shpirt vargjet: *“Pa dëgjo fyellin ç’thotë, / Tregon mërgimin e shkretë”*. Fati tragjik i çdo mërgimtari do të shprehej fuqishëm me vargjet: *“Që kur se më kanë ndarë nga shok’ e nga miqësija, / Gra e burra kanë qarë / Nga ngashërimet e mia!”*

Këta vargje janë thujse të njëjta me ato të origjinalit, me përjashtim të ritmit, i cili është tetërrokëshi ynë popullor. Vura re se poezia e Rumiut nuk është përshtatur deri në fund, ku poeti persian shpreh edhe mendime të ndritura filozofike, në linjën e panteizmit sufi, rrymë që mbizotëron në shek. XI-XII në Persi.

Kjo formë të menduari u praktikua te Shiizmi persian, i cili shpallte në të njëjtën kohë se aty gjendej dhe shprehej thelbi i mësimëve të Kur'anit islamik, i pandryshuar nga kohërat.

Sipas shiitëve shembulli më i madh ku rrëfëhet Zoti është *përtëritja*. Këtë doktrinë, e cila përshkon tejmbanë krijimtarinë e XH. Rumiut e pati pëlqyer shumë edhe N. Fashëri, e cila gjen shprehje në poezinë e tij shpesh: “*Sot është një ditë e rezë / Që përtëritet moti, / Lind vera, lind ngrohtësia, lind Aliu vetë Zoti.*”

Dhe më tej ai ka shkruar: “*Ngjallen të vdekurit gjithë, mal’ e fusha gjelbërojnë / Qielli qesh, dheu gëzohet dhe luletë lulëzojnë.*” (“*Luletë e Verësë*” 1890, “*Dita e re*”)

Nga ana e tij Rumiut e pranon mistikën e Gjithësisë, të Botës dhe të njeriut, dhe u bë një ndër mendimtarët më të shquar që zbuloi tek *sufizmi* dobësi, pse njeriu edhe i përsosur të jetë, nuk e lënë djajtë të shenjtërojnë. Këtë e tregon shumë qartë poezia e tij, “*Gomari i shitur*”.

Në fakt ky botëkuptim u fut në kuptimin e botës që nga antikiteti; disa thonë se u fut që kur u shkrua në tempullin e Delfit shprehja: “*Njih veten*”. Thanë që ishte një mendim i Sokratit, por ky mendim depërtoi te dijetarët *gnostikë* të Aleksandrisë dhe si kaloi në Azi, mbërriti në Evropë sërish në periudhën e Rilindjes, erdhi deri te Makiaveli, i cili e rishkroi sentencën: “*Nosce te ipsum!*” (*Njih vetveten*).

Shumë studime ka patur rreth problemit të njohjes së botës, deri te mendimi se *shfaqja*, *dukuria* ndjek rregullin e pasqyrës, e cila reflekton dritën, e kundërta është *errësira* dhe me të lidhen enigmat, mistika e botës. Rumiut vjen deri aty se shpesh bota pasqyrohet e paqartë, ashtu si ndodh me një pasqyrë, e cila ndërkohë ka vënë ndryshk. Një mendim të tillë e gjen të shprehur edhe te Rumiut.

Kështu edhe te Naim Frashëri gjejmë vargje si këto për të njëjtin botëkuptim filozofik: “*Një që njeh veten e tija, / Edhe merr vesh Gjithësinë, / E di ç’është Perëndija, / Dhe ka udhë njerëzinë.*” (“*Vjersha për mësonjëtoret e para*”). Shtypur prej shoqërisë “*Drita*”, Bukuresht, 1886).

Si te Molana edhe te Naimi është shpirti që e mban gjallë njerinë, po edhe të gjithë Botën. “*Ai shpirt ngjall qiejt, / Gjithë ç’ka në hapësirë, / Dherat, hënërat, diejtë, / Shpirt’i bukur e i mirë.*” (“*Vjersha për mësonjëtoret e para*”, “*Shpirti*”, f. 37).

Njohja e Zotit është një mister, pse? “*Njeriu o Zot! / S’ta di emërin tënt / Se s’gjendet me ment, / Ah, s’e thotë dot! / Pra Zoti është një fuqi pafund!*” (Po aty, f.31).

Prej kohësh shkolla jonë e ka ditur se poezia “*Fyelli*” që zë vendin e parë në *Masnavi*, si një poezi drejtpërdrejtë autobiografike e Rumiut, ishte e përshtatur nga Naimi në shqip para vitit 1890, por nuk njiheshin përshtatjet e tjera të tij nga poeti i madh persian. Po rendit këtu disa nga krijimet më të bukura të Rumiut, të cilat kanë tërhequr vëmendjen e poetit tonë të madh kombëtar dhe këto janë ato që janë botuar në vitin 1894 te libri i tij: “*Parajsa dhe fjala fluturake*”, (1894). Poezia “*Pesha*”, e teta në libër, flet për atë plakun që shkon te farmacisti dhe i kërkon pak peshoren të peshojë florinjte. Në përkthimin tonë kemi shënuar se motivi i saj ndodhet edhe në një përrallë të folklorit tonë. Vjersha: “*I urti dhe i marri*”, “*Guguçja*”, përkatësisht: “*Udhëtari që kishte ngarkuar gurë dhe grurë*” si dhe “*Tregëtari dhe papagalli*” të Xhelaledin Rumiut, dy kryevepra poetike të tij kanë tërhequr vëmendjen e Naimit dhe i ka përshtatur ato me tituj

të rinj, po vargjet janë po ata, si tregohen edhe në përkthimin tonë: “Dy thasët” f. 40, “Tregëtari dhe papagalli”, f. 56, si dhe poezia: “Argjendari dhe peshorja e floririt”, “Pesha” si dhe “Mësim për atë që kapi një zog” e përshtatur edhe te poezia e bukur “Zogu dhe djali”, për fëmijë.

Ata që do të lexojnë këto poezi tani nga Rumi, menjëherë do t’iu kujtohen edhe vargjet e Naimit: ...“*Nga vjen o i uruar? / Ç’gjë ke marrë e ç’ke ngarkuar? / Një thes, tha, e kam me grurë / Tjatrinë mbushur me gurë! Se nukë kisha drithë / E hodha në një thes të gjithë. / Po ana të mos më bjerë, / Vura gur’ o zotth i ndjerë!*” etj. Shiko edhe “Masnavi” *Dy thasët*, f. 40. Vargjet Naimi i ka në 8 rrokësh, por brendia e tyre është thuajse po ajo edhe me përkthimin tonë.

Më duket se nga Xh. Rumi Naimi ka marrë idenë e librit të tij “*Mësimet*”, duke u përpjekur të sqarojë parimet bazë të bektashizmit, një sekt jo shumë larg shiizmit. Mësime të tilla, por edhe shpjegime të tilla mbi besimin, i ka derdhur me një frymëzim të veçantë si Naimi, ashtu edhe Rumi që shquhet për predikime të pastra të besimit shiit dhe me një horizont të gjerë të islamit, i cili predikon aq pastërtinë e shpirtit, moralin e lartë, po aq dhe vëllazërinë midis njerëzve, atëherë kur ata janë të pastër e të singertë ndaj njëri-tjetrit. Te libri “*Masnavi*” të Rumiut si dhe te “*Bisedat*”, gjejmë mësime të tilla kundër prepotencës së mësuesve, kundër predikuesve falsë si “Fakiu me çallmë të madhe”, etj. Për këtë poeti u cilësua nga pasardhësit si një nga përfaqësuesit më të mëdhenj të “*Kur’anit persian*”, pse ky poet dhe filozof u vu gjithnjë në kërkim të së vërtetës së Zotit, natyrës dhe shoqërisë. Te vepra e tij ne hasim mësime të tilla dhe një frymëzim të tillë të pastër, prandaj ai ndodhet pranë nesh edhe tani pas 800 vjetëve. Poezia e tij është sociale, e shkruar në formë të *odeve*, ose *baladave popullore*, si dhe me një fjalë të gjallë e të sigurtë ai më ngjau tek e përktheja më tepër me Shekspirin e Lindjes së Iranit.